

今白華堂文集

萬壽演連珠

臣聞星虹輿祉彰福緒之日溶山谷神音孚德基之嵩積
是以延洪增泰筵由旬而衍无疆臚實闡鼎模位五而歸
有極

臣聞顓序譽遵圖矩廓其漑徧唐文嫺倣期象甄乎闔苞
是以周甲啟元芝璽叶環循之運明丙照寓蘿圖席蕤繼
之交

臣聞舉洪頤而登瑄玉縕豫爲紛颺高燦而引雲孤鶻亨
祇事是以朱涂靜蹕美光延大祀之三元酌升虔靈歆記
日至之二

臣聞鼓九陽以陶鈞成鳩之化穆龢四選於通正泰鴻之
氣調是以雲循風叢眠靈臺而瑞屏雨寸雪尺論郵匭而
澤饒

臣聞玉券儲華邃牒煥碧盧之禩金枝啟匱祕謨兆蒼籙
之祥是以寅盟誦於寶函神墨靈式洪啟佑慶勒成於恭
館靈蘭元扈燿尊藏

臣聞廓鴻紫極疊抱蜀而凝神詒燕彤闈肅降庭而稟式
是以宮規欽瑑瑑昭茲金鑑鐵牌家法係羹牆宛爾葛燈
土壁

臣聞斗車幹五緯迅厯旦昏穹蓋渾四游健運冬夏是以

夜甲乙而披牘丹毫靜握神機日雙隻而傳餐黃屋勤宣
鈞化

臣聞橋陵弓劍通肝蠶於豐融幽館隰泉循締構以滋大
是以松山書戰契珠鈴玉帳之風雲柳邊省方攬黑渤綠
江爲襟帶

臣聞繁林翳蒼蘭艾別叢靈海委輸潢汙合派是以懸鑑
衡而甄物黜陟允協五明闢旒纘以采言隱揚不遺一介

御製大閱詩分聯恭演連珠

御製大閱國家重多年未舉行

臣閱參臚著象則威柄建於辰樞雷豫待時則震聲藏於淵默是以模閱璿極考典而式戎經囊蘊珠鈐習祥而紓羣力

御製士間恐失教世治莫忘兵

臣聞風霆至教若倣恬霽之辰日月貞明不邁炎上之烈是以投戈息馬及閒暇而申防偃革韜金保治安於克詰御製六代臨寰宇八旗練俊英

臣聞義策開祥六位以閱乾造軒圖剏制八陣以叶師貞

是以懿典宣光允襲六而爲七戎行循律儼隔八以相生

御製河山敷渥澤帶礪守宗盟

臣聞灑風沐雨紀受氏於黃雲熏土苴茅協卜世於蒼籙
是以神都肇奠屹衆建之金城寶興永甯蔚蟠根之喬木
御製丙歲鴻基受王春鉅典呈

臣聞虞史述重華紀元在丙麟經誌大閱書幹維王

春秋公羊

傳壬午大閱是以芝璽凝庥光億期於丙炳蘭防示禮洽百福

於王林

御製涼鷹臺峻峙飲鹿沼修平

臣聞萊田表墊不若仰靈臺之崇雍草澆泉何如挹靈沼

之潤是以鷹揚氣竦翼圓幄於重垓鹿柵影清鏡方塘於
列陣

製組練千軍列貔貅萬騎縈

臣聞授甲爲令逞容於蒼羽赤章同馬著吟齊力於吳騶
魯驥是以犀鮫煙聚非止護軍名軍組舞雲連不惟驍騎

稱騎

製乘黃巡眾隊擐甲視連營

臣聞日行黃道而風雲自開斗爲帝車而壘壁胥靜是以
珠梁乍御控織離以塵清玉勒載周式韎鞞而師整

製御建幟捎雲影排槍殷地聲

臣聞招搖上指則九天非高豐隆下馳則九地非寂是以
正鑲旗會析羽之幟騫霄子母礮俱連環之槍震霹

御製止齊聞鼓進嚴肅聽螺鳴

臣聞立動以謹必諧擁鐸之節及表乃止無易銜枚之心
是以聲夔合鐃振雷門之律令吹蠡應角迴海浦之潮音
御製既覽威儀整應頒賞賚宏

臣聞度軌三時廣場皆書禮之圃喁歡七校上林多仁惠
之虞是以舞盾交綬合鴈行於整暇頒鏐匪銑揚鳧藻於
怡愉

御製投膠孚志氣挾纘洽恩榮

臣聞衢樽飲化甘於醴泉綸綍宣仁煖於布帛是以燕胥羣從同澤之志比諧錦賜千官同袍之情均懌

御爵自朝廷授功由祖父成

臣聞人惟求舊則閎閱宜選勞官有世功則主組非虛貴是以爵桁旣設襲恩猶汗馬之年豹蘇方揚奮績記從龍之會

御有爲新事業無忝舊勲名

臣聞箕裘振緒良用前規旂常述銘盛傳後起是以五福敷

皇極進猷守而邦其昌八族萃

帝廷勵庸功而世其美

御製固本先勤儉服官首敬誠

臣聞本教無渝斯圖鞏磐石官箴有恪斯績著翰屏是以奉勤政之謨旨符崇儉揆敬事之分義括原誠

御製推心承

考訓勛爾眾干城

臣聞武烈維承四方循勉勉之紀德教所及中林表肅肅之風是以事述

前甯疊雲章於玉簡勛申夫子儀奎藻於

璿穹

康山夜話

夏日可畏夏月則可愛冬日可愛冬月則可畏畏愛異矣
畏與畏愛與愛又異矣愛日如孩赤之得慈母愛月如酷
烈之還清時畏日如被權勢相炙畏月如遇窮子見讐嗚
呼孰知冬月之可畏且甚於夏日乎余少壯時嘗喜坐寒
月下爲人談說往古戰鬪及所聞見不平之事比各歸就
寢輒仰面誦李遐叔語曰月色苦兮霜白蓋雖藉清涼以
洗滌胸中煩鬱亦未嘗不知其爲苦然不知其苦之至於
不可忍也去年十一月旣望漏二下猶徘徊中庭占句云
莫怪寒宵貪看月今年只剩一回圓入此歲來南舟北馬

與駒隙相逐負嘉月者數數矣今夕出戶仰見月圓猛然
省覺是爲十二月之望因憶去年句謂當愛惜彌甚也亟
命坐則竟不能坐且不惟坐不能卽小立亦不能甫駐足
覺愁苦之氣相逼使毛髮悚慄神魂危殆急返走且僵嗚
呼窮冬如此窮民何如爲政而不惠民之窮其亦不知窮
之可畏歟其知窮之可畏而不知彼之窮之令我可畏有
甚於我之窮歟乃顧謂恩曰善爲政者使己視民如夏月
不使民視己如夏日使民視己如冬日不使己視民如冬
月

客聞余言有問曰夏月冬月前人詩文中以指時月之月

何未聞以月色言余曰固也此二時之月非若秋月春月之宜人可入詩文也雖然詩文中冬月則曰寒月夏月則曰清月寒月言其苦不復以冬月稱宜矣清月之妙不減於春月秋月何不卽以夏月稱語言文字有相習爲常遂成典要細思乃不可解者考據家於不必考據之事必支離穿鑿以伸其說亦目不見睫也夫戊子十二月十五夜半呵凍書

書前說旣竟以餘楮染膏於燈而燃之須臾焰息見餘火尙星星隨膏走膏盡火始盡因喟然曰火與膏之相尋而不得止也人之精力神明肌肉膏也其心之營求火也役

役者以火燒膏宜爲二氏之所憫然天生膏又生火固不
欲其不盡歟膏不爲人用久之則無用且亦枯而自盡矣
不能仙不能佛也世稱神仙五百年須避雷劫余門下士
汪解元能肅曾著論以爲修短天命神仙不受命而抗天
故雷擊之或曰雖擊之終能逃於劫外此其所以爲神仙
余則謂神仙亦無有不死者如漢唐後所稱神仙非周秦
之神仙周秦所稱神仙已非上世黃軒時之神仙偃佺洪
厓浮邱之徒今皆安在此其有生有死與人事相代謝之
明證矣至涅槃茶毗佛之告人以死尤彰明較著釋迦生
七十九年而卒見於柳文而爲其學者以爲金身不壞夫

金而躍冶則金不祥必無此金也膏而避火則膏亦不祥
必無此膏也二氏欲長留無用之身甯有是哉然則有是
膏而役役以用之乃爲得所用乎是又不然矣何以用之
曰君子勤禮小人盡力

悲哉康武功之託此山也以風流放誕舒其騷屑鬱勃之
懷至今風雲草木皆疑其精靈所結聚也若濡迹以濟人
擬於慈明之就董卓仲弓之詣張讓昭昭然伸志義於千
載丈夫處世所樂爲者在是固當無悶亦無悔焉噫滇之
碧巖以惺菴先生傳而茲以先生傳天生兩大魁殊才接
迹若專爲兩山重者山靈其遙相慶於有遭乎余疇昔之

今在華堂文集卷十九

夜蓋夢寐見之十六日曉起又書

答陳笠帆中丞書

本月二十日單縣途次接奉鈞函知尊體頤養復元慶慰無量伏惟閣下忠誠體

國見事必爲於知仁勇三達德直欲兼之無媿而某章句陋儒謬爲大人先生所期許雖初膺外任亦未甘有負生平徒以積疲之區艱於施措道員官同癩贅勢等桔槔一載以來心焦舌結頃值麾幢莅止寸私踴躍遂爾冒昧瀆陳猥蒙垂鑒愚衷推誠逾格賜示至于數百言古所謂必咨於周者虛衷青目至此自維愚賤得此於人蓋寡猶何能不罄所欲言伏查某所屬地方民風固稱健訟其圖准

不圖審者一控之後原告卽避匿不到該州縣不爲照例查銷致被證人等受其拖累已屬非是至控出有因兩造具備亦多延擱不辦令書役得以私押索詐訟師得以挑唆牽引迫經上控復又抗提刁徒之藉端挾制實屬有激使然某去歲駐工於附近居民喊告者面訊之下卽派一佐雜猝喚被告來前問得實情宛轉開諭率皆遵斷罷息可見衅端初起無難立解該州縣於承審案件任催罔應甚至懸案十數年之久恬不爲怪猶靦然以民情爲刁悍總因其平日各有私圖以官爲寄無暇經心案牘之故茲奉嚴提上控各案該州縣始知儆惕應再請通飭查明原

告逾限不到者照例詳銷以省繁冗此外無論自理發審各件酌予限期勒令依限詳結庶可漸就清釐至各屬緝捕更關緊要該州縣於奉

旨查拏逆犯祝現等或希冀邀功畱心訪緝卽不然亦尙託之空言以見其不敢懈弛而於巨窩盜賊竊劫公行往往不以爲意思竊謂逆犯竄迹如蟲蟻之在地果將地面掃除潔淨則蟲蟻自可立見若塵沙壅積猶安知蟲蟻之有無今各州縣於編查保甲自謂實力奉行而巨窩之內匪徒充斥曾不敢過問又無論逆犯矣況盜賊藐視官員日久必成大患此間南接江省之豐沛蕭碭北連直隸之

順廣大一路羣匪錯雜句結尤易念此實覺刻刻寒心某到任後卽以此言通諭各屬奚啻再三竟無隻字申覆其呈報竊盜及控告刑捕參賊分贓之案日積日多亦絕少報獲賊賊者或萬不得已賂賊完案則痛心切齒視原告如仇讐某於接見之時勸誠備至並以該員等卽不肯爲國爲民亦當思眷屬在署萬一有事身家難保如此苦口危言亦竟置若罔聞緣州縣刑書捕役與盜賊聯爲一體儼如水滸傳光景由來已非一日並或刑捕擅權則盜賊卽充刑捕盜賊勢熾則刑捕復避盜賊本官能自設良法不靠刑捕者絕無僅有此其所以相顧束手者也茲謹就

見聞思慮所及條列緝捕事宜希鑒擇一二飭下遵行或
能各知黽勉要之欲挽頽風總在州縣目前頽敝者衆欲
劾之實不可勝劾且人材本非易得更易之際未必來官
皆勝去官以某臆見莫若稍加甄別先示以風氣之準謹
將所屬各員分別優劣開摺奉呈乞將優者賜之獎勵劣
者飭令痛改某亦當隨時訪察儻有狃於積習難望振作
者必嚴揭請參斷不敢稍避嫌恐所有緝捕事宜附列於
左統祈亮鑒

一查各屬窩賊處所在鉅野有田家集茨美屯柳林集
李家樓在汶上有陳家樓山楚營岳家樓馬潭在曹縣

有冉垵集苗家土樓在金鄉有程家樓在嘉祥有紙房
在單縣有黃岡集各等處皆與刑捕串同一氣該州縣
徒委捕役奚啻抱薪救火某見訪得冉縣窩賊之捕役
傅勇委員改裝前往黃岡集纔能弋獲聞地方居民尙
恐該縣有回護之意蓋地方官向來惡習如此計須奉
省檄嚴飭各該縣庶足以警動其心

二近查各屬捕役中間有因本官嚴比勉力緝捕竟被
羣賊挾恨致斃者所購眼線亦然緣盜賊公行之處往
往接連數村莊盡係賊窩雖有一二可靠之捕役及眼
線無如衆寡不敵何也見在飭令廣爲設法務期有濟

一查金鄉等縣紳士曾助地方官守城爲往年滋事之教匪所憚近來盜賊串通刑捕直倚衙門聲勢以竊紳士之家則紳士不敢以地方官爲可恃彼此形勢俱孤宜盜賊之益無忌憚也某訪有可靠之紳士嘗親身往拜面詢盜賊情形並委令幫同查辦該紳士等頗知感激自效去冬飭委謝同知前往金鄉拏獲盜匪卽有係紳士所舉發者隨通諭各屬令其擇紳士中之公正者用爲耳目或亦於捕務有裨耳

一鉅野賊窩最著上年經署令王朝幹搜捕無遺訪得該令並不任用捕役惟密諭事主自行購線並雇備壯

今日事堂文集卷二十一
勇候該令乘便帶往查拏遂皆贓賊並獲某見已札知
各州縣做照此法未悉能實力奉行否也

一查沂屬日照爲產鹽之所鹽梟私販出沒三四州縣
其夥匪甚多此輩亡命固不宜辦理過驟但恐地方官
或漫不經心則所關匪細惟當時時督飭嚴防

一查滕縣之南山社離縣城二百四十里山徑錯雜地
方遼闊常有掖刀匪徒竄迹其中僅於相距百十里之
臨城驛駐一縣丞不足以資彈壓似應奏請添設營汛
以杜隱患

上程鶴樵中丞書

昨奉鈞函令續陳通省大計虛衷下問非愚者所敢擬也
雖然敢不竭鄙誠以效芻獻竊惟此時整飭東省須先除
錮習蓋爲政之道首在乎正本清原卽不得已而補偏救
弊亦期名實相符若虛言補救而偏益加偏弊益增弊則
本原之患將日甚譬如人身之有瘡痍固所云急則治標
然未有割截筋脈雜投藥石禁絕其飲食改廢其起居而
能奏效於倉猝者不特不能奏效并未有不氣耗血消他
病百出以至億極而斃者屬在一脛一指爲害猶隱若胸
腹之間則愚者亦知長慮卻顧矣而羣醫務售其術必專

摘所患且竊竊焉以顧及起居飲食者爲迂拙而不適於
時山左固天下之胸腹也所患瘡痍不可勝數其顯然衆
著者曰虧空曰匪類曰辭訟三者早宜認真何待今日至
今日而始似認真者以事皆上聞屢奉

嚴旨恐無所逃罪也至今日而仍非認真者以事關上聞
卽爲風尙遂思託以見長也是以託言查虧空而不求所
以杜虧空託言緝匪類而不求所以除匪類託言理辭訟
而不求所以息辭訟卒之虧空益難查匪類益難緝辭訟
益難理而吏治民風皆深受此託言三者之大害夫東省
倉庫空虛歷有年所從初破案後奉

旨查辦一查再查大吏皆以爲奉法惟謹然自十九年迄
今勒追歸補者僅祇若干數而接續參出新虧又已積至
若干案是措繳皆屬掩挪毫無實際可見虧空一端病在
查而不杜也州縣得項有數賠累無窮或本係累人復處
累缺清查既有漏報奏銷復有墊解驛站更有支應本任
公務有賠貼合省公務有捐攤百孔千瘡比比皆是勢不
能不亟籌調劑卽如進省各員耽延日久盤費不貲此後
非萬不得已者應毋許入省又如司書勒扣等弊較他省
爲獨甚此後扣款應責成藩司嚴查禁革其勒費則必藉
駁案而奏銷冊爲通年各案之總據應令各屬於每年奏

銷後飭吏赴司將冊底照抄備案隨時證訛以免藉手勒索又如應捐各衙門書役經費欠解纍纍此後查係各前任未交者應於本任名下除去免其追解若此之類款目不少自可列布章程俾各州縣賠累之處損之又損力量既贍然後可責以彌補彌補之法與其徒追舊欠不如先絕新虧前此議絕新虧者亦以隨征隨解爲正辦惟因有民欠尙可於冊內牽混通挪故凡冊報征存未解者卽係暗虧經此次欽奉

恩旨民欠旣已悉蠲嗣後祇須於上下忙比較分數是否隨征隨解無從挪掩則新虧自絕所有舊欠宜再量其缺

之肥瘠專責該管道府酌分限期勒令以次完繳或以
領司款作抵者宜卽劃抵删除母任久存司庫輟轉弊混
致屬庫欠款虛懸至倉虧一項前此多已追繳穀價存貯
司庫亦宜及早發還由該道府承領督飭原虧各屬相度
時價便宜買補總勿令有名無實如此則虧空可漸杜矣
東省毗連鄰壤處所古稱盜賊之藪乃平昔皆習以爲常
上年奉

旨嚴緝在衝要各處搜捕數人使多盜聲名不至遠播卽
又栩栩自負以爲頓就肅清其八卦等教惟奉文緝拏指
有名姓者希冀弋獲邀功此外皆無心訪察銷聲匿迹實

繁有徒可見緝匪一端病在緝而不除也夫大路劫掠其聞所肆掠者豈必大路逆犯罪惡其見能逞惡者豈獨逆犯查盜賊之在東省多半狃於惡俗竊劫窩藏公然視同本業甚或紳衿富民甘蹈蹠躋之行收召好勇鬪狠之徒習拳棒持器械與捕役刑書汛兵巡弁互相鉤結恣行罔忌此非若暫迫於飢寒可以速爲止遏計也其法在首懲捕役凡捕役非盜賊出身者必通盜賊否則卽以盜賊充捕令事主不敢過問以逞其盜賊之爲應悉數收治募勇另充使良民公具保結贍其衣食厚其獎賞以責其立功又控告大窩竊盜或數案互相印證者應密傳衆事主自

行購線跡訪明確導引本官帶勇馳往掩拏免致不肖刑
捕遞信縱逸又巡汛官兵查有通匪實迹應按律從重明
正典刑此外或因時制宜或因地利制宜參考古今弭盜之
法自能得要至邪教由來已久經十八年間大加懲創比
歲幸遇屢豐閭閻樂業此輩無從煽誘且疊奉

恩旨投首改悔准予自新者不少見因密查六逆周訪各
鄉集村墟皆稱安敕但恐革面未盡革心伊等既自附良
民防制尤宜慎密往時因查拏邪匪挾嫌誣控驚擾多人
近年此風稍息卽由慎密所致斷不宜捕風捉影再滋惶
惑總在地方官時刻警心恪遵外示疏懈內實嚴密之

聖諭不動聲色設法偵探如門牌戶冊保甲之類行之以實勿致虛應故事自可發奸摘伏弭患未形尤在人地相宜於緝捕最要地方務擇深明利害精細結實之員稍爲破格隨宜調補寬其別項處分限年課效卽予升階並爲立定章程俾知遵守如此則匪類可漸除矣東省官雖怠玩其聽斷獄訟當亦不甚異於他省而上控京控較他省多至數十百倍其實係負屈者十無二三餘皆訟棍主使架捏大題以遂其挾制官長拖累良民之計上年奉旨清釐積牘奏結之案非原告避匿不到卽勸令兩造處和暫行擬結求其剖判曲直接律懲治者絕無僅有一事

瞬而已結復翻舊案悉成新案可見辭訟一端病在理而
不息也自古有重典輕典之分東省莠民刁健已極固於
重典爲宜某則謂并不必重典也我

朝立制至精至當趨時者慮及京控無由墨守成法誣告
不敢坐越訴不敢問訟庭之上雀鼠囂凌訶斥猶未敢加
何況笞撻斯莠民所恃以逞志耳查律例所載誣告者告
官告吏者所告祇戶婚田土及口角細故者越訴者驀越
赴京者本省未控告未審結而京控者原告臨審避匿不
到者不遵用狀式及攔輿喊叫者訟棍教唆者皆定有罪
名所以明辨等威使民知嚴上於東省尤爲救時要術推

類求之歷歷俱有法守水懦民玩若果執法無懦再能懸立賞格購拏訟師則刁健者何恃而敢然至於伸冤理枉乃聽訟之本案內冤枉幸獲平反者不過一二人而拖累羈禁者每案輒數十人流離疾痛甚且死於非命其爲冤枉復奚由伸聞閣下前在臬司任內凡遇州縣詳解各案牽控雖多非緊要被證必應摘提者不許解省搪塞彼時省監及外押人犯由五六百遞減至三百人以內乃近年竟多至千餘人雖經前撫部疊飭司府分別審釋隨去隨添見在尙有若干名之多無辜良懦受害於刁徒官吏束手坐視超雪無期民困殊甚亟宜量度輕重稍涉拖累

取供釋回此後案外牽控之人毋許率行傳案總皆援照律例訂爲章程如此則辭訟可漸息矣若夫託言此三事貌爲認真以爲於吏治民風大有振作則其流弊所至害於吏治害於民風有不可勝言者語云有治人無治法東省則因無治法益無治人平時升遷調補凡曾經隨營及催漕防河之員雖人本平庸無不具稟爭缺上司無如之何曲爲安頓已屬有礙吏治迨自上年至今州縣因虧空監追者若干員勒追者若干員因案參革者若干員撤回者若干員見在調省者若干員入局者若干員無論廢黜之人不必皆劣於信用之人而凡有進退其本員多係委

員署理並有違例以佐雜代理者既無責成又未必能知大體任意虧挪廢弛其勢固然卽以本員處本任竊見州縣如此難爲慄慄危懼朝不保暮而且坐催錢糧巡緝各匪守提案件之委員以及差弁捕役紛至沓來應酬不遑人情靜而後能安安而後能慮不靜不安而能慮及民事者鮮矣百姓之於州縣猶子弟之於家長也家計窮急之際幼弱子弟必從而受困其忤逆不肖者則乘便自專詬誶勃谿無所不至故吏治壞而民風隨之見任猶難於坐鎮代理更何從約束把持錢漕先斥其浮收裝點小竊便詆其縱盜抗拒傳審反誣其延案以下犯上操縱自如一

州一邑之大藐然若無人主宰者民風流極至此可爲寒
心且省中統轄各郡上司雖精明耳目心思豈能逐處周
徧知府古之二千石責任綦重於所屬地方見聞最切分
應畀以整頓之權如其弗勝儘可劾去乃令州縣踰越等
級事無公私亦無鉅細皆得徑稟上司州縣視知府如贅
瘤則百姓亦視知府如土偶數千里地方謂全賴省中彈
壓綜理可以處處放心此必無之事也夫爲治不可有偏
重查虧空緝匪類理辭訟本寓於庶政之中非求於庶政
之外忽庶政而偏重此三事已爲不可又況馭下如束涇
法令如牛毛手足無措綱紀紊然積重之極勢將難返人

書
藏於所習多隨聲附和於已然而不能識微鑒遠於未然伏惟閣下以蓋忱體

國以清衷度務必已燭照及此特慮衆勢阻撓耳某以爲聖人在上自可徹底陳明破除錮習今先宜舉最要數事條列奏上一令藩司將勒追清查案內已繳銀兩核歸帑項以清奏銷而杜牽混一禁見任州縣借審案交代爲名逗畱省城一令臬司將京控省控拖累人證分別摘釋一禁各上司衙門不時輕調州縣進省一禁以佐雜人員違例代理州縣事務一禁各上司衙門以無關緊要之事率行分委員弁牽掣各屬一禁各上司衙門調派捕役分

各州縣騷擾地方一禁州縣以並非例應通稟通詳之事
輒行徑達上司或進省面稟不由知府申轉以上各條一
經奏明卽概行通省內外嚴飭遵照如有藐玩者立參治
罪猶孰敢各執意見陽奉陰違至某所約舉杜虧空等項
應行推廣議立章程尙祈通飭該管道府各就所屬地方
體察情形參核例案逐條妥議具詳閣下與兩司覆加籌
酌奏明請

旨定奪再行飭遵又京控案件應奏請飭下刑部都察院
步軍統領衙門悉遵舊例分別准駁從此人心可定法度
可施閣下宏展經綸率屬興治東省雖甚疲壞未必不日

有起色承問不揣冒昧越分妄陳死罪死罪某頓首謹上

與陸理齋山人書

理齋勉之余非昌黎子之質過於浪仙也僧推月下門不獨無致乃近狎邪浪仙猶推蔽其間豈中人以上哉後竟爲中晚唐一家子眎余稿草固未見有此等語其可成家無疑矣自唐迄五季詩僧寒山拾得以下凡百有十六人道士則司馬承禎至魚又元纔十有八凡物莫不貴少而賤多則道者於詩尤易取貴也吾聞儒釋之混自道始晉宋間士大夫崇尚元理浸淫以入西域諸書而後二氏縱橫於天下吾豈敢與老之徒哉若子特其名而已詩固儒家事詩而隱於道則滋足以爲功嗜人世有詩境焉通闕

大居响雷空煙繡碧其內絲簧彼姝蠅趨何人插筆腦後
鼓舌僇倖嘒嘒和唱濁我胸胃迴望城北叢樾蕭寥紫翠
丹房水竹間之其信可以幅巾雅步與白雲期者乎化機
在前無爲勸子舉進士矣廬山陸修靜道者也文采與陶
隱居相映吾於蓮社圖中接其貌彷彿理齋祇微有髭耳
夫使古今有兩陸道士吾奚爲不與道而與俗理齋勉之
吟暇可且讀高士傳以次泛覽儒書也頃得子師張學博
訊中有所觸故云爾

與郡學兩博士書

昨見辱承示修郡庠之舉董事等具狀觀察欲令首列賤名已奉懇代謝不敏矣而二君若有難色將毋疑僕爲阻此善舉耶縷縷私衷敢明布之郡城數十年來藉公事募捐殷戶幾無虛日始由權豪書吏慫恿本官聯結紳士奉官以率作之名予紳士以斂財督役之聲勢而所謂紳士者紳不過一二餘皆職監商賈欲交通官吏以聲勢傾閭黨耳僕自退歸非獨處隱就閒性不樂溷迹此中亦念風氣頹壞將無所底杜門壁立聊絕引援人亦遂去之不顧也夫歷次所營何事不名爲善舉不轉瞬而皆廢道路怨

噴好事者不亦可以已乎乃又有社倉之議昔朱子以六百石立崇安倉今聞新舊捐存幾及萬緡視崇安可三五倍而請捐不止此朱子所云糜費鉅萬計不足做得一事者至郡庠固宜亟修當道若籌畫經費專委二君遴諸生董役仍舊貫毋改作則費可不濫若崇飾侈靡本非所以事聖人也抑衆知事多難集請諸觀察將以僕爲市僕滋不願耳且官文書多直斥紳士之名僕以爲紳與士別紳與紳又有別定制兩司陞觀奏事官奉詔傳宣皆姓而不名名之見重於

朝廷如是宜不得以自輕仲夫子不云乎吾亦愛吾鼎願

二君深察之幸甚

再答李鳳山書

昨復荷枉書存問並訊及出山之期雅意勤懇若不願僕之安於廢棄者鄙性顚固自涉學後但欲以文史自娛耳謬致通籍不敢云竟無宦情然竊意學者之仕在自揣其中之所可發抒者盡乎量而止苟非量所能充而思假名位以附益則所益皆疾僨也僕以淺殖張揚於中外亦旣枵然罄竭所有矣東魯聖賢之邦餘教遺風莫能追挽萬一曠職之罪非不深疚於懷然曩所盡力補苴已致乖忤於時其中尙何蘊蓄能出而調劑從容以底一日之成乎人苦不自知僕之自知深於執事之知我也邛園半畝蔭

茂樹聽禽聲俯仰自若暇則事筆硯聊述平生梗概以示
子孫而已每念關中同學佩青旣開府西江年兄復擁旄
海岱此在當日已若慶雲先覩嘗對院司諸公僭擬三樂
謂一生之盛在是者今而自證自慰益可死悶又不覺自
忘其廢棄也王遵巖與人書曰講道於朋友閒使信之者
衆傳之者昌其所及顧有過於用世之所獲諒哉斯言又
豈欲以彼易此乎願執事輩功業日新用慰遠望不宣

恭進

御製全史詩輯注表

伏以

皇圖甄曜金模苞鳳紀之編

帝籍鑄華瓊笈韞龍盤之字敷大文而倬漢潤澡星源播
懿律以丕天祥開日域輝揚青纂朗心鏡於千秋葩綯丹
騰叶神樞於五際洪規斯廓衆說咸郭臣誠懽誠忭稽首
頓首上言竊惟碧虛邃牒導絕軌於披繩白阜靈圖勦椎
輪於載筆侯岡履位通政教以龍文沮誦分官誌紀綱以
鳥篆世家抱籍綿延於終古向高前志撫言約略於遲任

史佚守藏柱下伯陽搜金匱之遺制作端門子夏觀寶書
之彙西山哀帙都從義類於春秋丙部排籤更判源流於
記傳古文璅語並存汲冢之疑舊事叢談間襲渚宮之陋
雲煙浩渺二十二史之正裁榛莽荒蕪八十八家之雜說
徧尋陳蹟易涉乖離博綜羣函難云貫弗惟夫編承麟止
追世紀於三皇典數馬遷徵繫姓於五帝伯夷執簡妣廷
則二代同科伏勝傳薪孔壁乃千年接旦運移冬霸頓素
臣品藻之功事附春王竟丹筆纂修之業韓趙魏斷從涑
水別綴珠囊宋元明輯始建安踵紬石匱如枚數闔哀書
抵百雉之城若網在綱汲古得千尋之綆循政理以參治

忽道筦胥通殫才術以佐盱衡詞瀾宜匪然而象歸藻鑑
難徧照乎殊形律本黃鍾詎并吹乎羣籟日星有曜吟壇
之月露俱微淵海無涯藝苑之津梁自阻興觀諸什略侔
汗簡之勲激宕數篇便號浣花之史從未有誦詩聞政上
中下古之胥賅比事屬詞風雅頌聲之並作流分條散祛
昔壅於諸編繩設衡懸等前規於百世彌綸宙合榮鏡登
閣如今日者也欽惟

皇帝陛下瑞炳瑤光神凝璿極上階符泰絙繩契以叶清
平東壁暉升燭埏絃而開習爽章分潢玉

味餘之旨越數千函萃雲珠幾暇之集排初二芸香披帙

時供寶思之經綸竹素連雲總入化工之融冶乃復審摛
五字秉裁於春槩秋槩閱攬億期蘊旨於乾苞坤絡溯元
太昊青虹昭蠶化之神言遞女希黃土黜媿搏之幻魁隗
出地變肉食於羸螭元律承天制握機於蛇鳥偃鰈倡樂
想鐵輪騁域之年舞翟應歌記寶甕充廚之日勦崇獬帳
升聞俄接於冀階華襲霓裳順攷載詳於漆簡十堯九舜
肇丌冊之心傳左禹右皋洽謨觴之指要蘖垂罷役颺言
猶念夫勤劬括象成圖納貢咸懷其虜穆鈞臺不享莅甘
澤而師貞閭巷無依怨斟鄩而戒切令嚴司馬奮揚逾烈
火之岡德薄真人放逐起大沙之野繕微言於左相泰然

停旒申誕告於東郊巢門返旆三年總攝聖廬遂感焄蒿
五世移居圯壤終辭湯渙植鰭聖佐和鼎鼎於胥衣飛雉
祥徵湊梯航於編髮乘黎弗恐援琴發宗子之悲渡洧偕
來仗鉞建新王之烈燎揚太室旋陳東國之疇幣棗文閭
曾卻西戎之貢跋狼元宰斧鉞決勝於殷逋繫馬上公紱
冕分榮於沫服鄘邶牽車之會康爵引慙離伊定鼎之初
土圭測景遷還九畢和恆未暇明農企美三宗保乂遑云
避位罪孥幹蠱仍蔡邑以分符兇孽弄蜂先蒲姑而作誥
政敷乘石詰戎環海之規官定明堂敬典下都之式宣綸
玉几閼翼室於宗臣奉冊黼裳謁豐宮於首祚四朝公輔

析里居以驗風移五典司徒糾履蹈而虞冰涉惜駟駒之
歎玉罔僕箴忘致犴狴之鬻金甫侯訓諄魁陵一蕩翰屏
惟同姓相依戎索重恢鬯瓚與附庸並錫七征亡統二誓
終篇鉦聲慨諸夏之爭衮鉞鑑東周之志開宗教孝類錫
封人定論昭忠名垂石子如棠失政納郛鼎以彌邪禦楚
資賢比隨珠而更寶冤埋笄寶射鉤之相遄歸信背旣盟
臥鼓之師驟捷美徵玉帛鳳鳴諸昌後之占亡兆土田鶉
伏遂假途之計一征仗義攜包匭於南荆八會懲奸肅衣
冠於東突徹俎膳而致福恩洽渠門辭庭實以明恭僭
黷鏤簋雄狐待困忘汎舟輸粟之仁小駟難歸慙改館饋

之禮焚巫政虐升陘之讎蠱甯防拒敵謀迂泓水之鯨鯢
就戮臨淄返國欵歔而錫繇田踐土還軍慷慨而收原邑
兩言盟在犒師竟折夫強齊三事教成夢搏何疑於柔楚
繼賊結好委管鑰以生心超乘貪功覆陵原而收骨敬昭
冀野薦賢登饁餉之賓恥雪彭衙佐霸奮纍囚之帥鷹鷂
除惡噬寶玉以空懷犀兕解嘲喜鍍金之生贖九州鼎重
聊城沂以縣陳兩廣軍雄繼伐蕭於戰邲信臣卻路鞭長
而命致樓車強敵忍傷轡并而師從桴鼓振頒豕社神交
取佚威儀塵上鄢陵戰器先亡禮信六官譽重儕舉善之
祁奚三駕勳隆推佐民之魏絳皇華奉使繹詢謀諏度之

文行露辭卿訂正直參和之訓投機受矢疲羣帥於私封
毀乘詛衛病公家於倍賦樂諧戎夏軍中之馬首偏乖謳
止暫黔臺上之人心自靜竊鉤何詰四封譏外盜之招乘
駟非恩十世垂令臣之勸美疾孰如惡石竟成負罪以奔
邾勸賞繼以畏刑何至良材而用晉宋左師之請邑布幅
甯知吳季子之識賢泥塗誰辱良猷鈞軸壞垣毀校之言
蚤歲琴堂製錦操刀之戒會連衷甲舊書聽命於蒲宮拜
罷角弓嘉樹興懷於棠舍澣衣志儉身安近市之居墮幣
心傷顏厚徇師之鉞蠆尾之更邱賦征並魯軍羊舌之責
刑書鑄殊孔鼎石言怨作營麕邾以立宮利蘊壁生敗虎

門而分室式金愆度空傳寢饋之所招辭玉完名不盡訖
揚之鄭志學徵雲火替陵增殖落之羞味濟鹽梅寬猛通
政和之效九言黃父符上禮於齊嬰五甲赭廬允除讒於
楚戍著刑鼓鐵棄執秩而令干灑淚庭牆賦無衣而師出
靡褻攝相卻萊早返鄆謹猊佩行軍墮費還偕申樂拇傷
橋李戴天之恨何窮心肆夫椒同壤之仇頓釋魯郊夜火
朱英冉子之矛吳沼秋霜碧血伍胥之劍別田賦入典物
荒垓束錦人還霸圖流水鱗文闡要二南之墜緒茫茫龍
爪提綱三晉之巖疆奕奕於是灌城智覆割地羸強白蛇
斷而西京開蒼犬戢而北軍起使通邛蜀役已困於狼臙

獄逮蕭周祚將衰於鸞咏貢符纂肆驅除徵白水之祥鉤
黨禍深騷動惑黃天之識神器三分之鼎先得臥龍悲風
五丈之原空驅流馬金墉舍徙山陽之廢轍環循鐵鎖江
空落下之兇鋒鼎沸瑯琊殘局紛節鉞以何功拓跋雄圖
易衣冠而自墮樗蒲舊迹青林早炫龍章射鼉遺殃畫拔
徒攀獼尾晒蕭梁之佞佛祇舍談經嗟元魏之分都行臺
擁駕荒同脂井天池之臘騎宵迴怨起錦帆御苑之螢燈
曉落義旗卓野開化日於文皇煒管臨朝兆履霜於女主
漁陽鼓震羣藩效蠶蟻之屯淮右兵銷諸鎮懾狼狽之翦
雄虺芒碭旋盜黨之交江凍雀紇干遂閹奴之同盡仇人

函首快直擊於銀鎗父禮傾心笑橫磨於寶劍上陵灑飯
難畱汴土之孀孤登屋裂旗忽譟檀州之將士運鍾夾馬
焚香孚祝聖之心景逝隙駒置酒感釋兵之語南唐歸統
鴻模蚤勝於恢邊西夏貽憂燕翼終疏於繼治書誣黃帛
偏爭安懿之稱法變青苗尙賴宣仁之化分門洛蜀黨碑
之名姓同鐫領局蘇杭艮嶽之亭臺競起隨五京而北陷
不返金輿媿半壁以南遷甯當鐵騎撼山莫動主和翻賊
孤忠覆水難收蒙業徒稱小孝奸排儒學擅專則手詔十
行險倖邊功通謝則頭行萬里燕城撤扞忍鹿走於完顏
襄水連兵憎龍興於鄂諾半閒恣樂西泠傳白雁之謠雙

節捐生南海換紅羊之劫潢池氛息資轉漕以開渠淨土
風沿幕席珍而贈爵功虧毫邑惜察罕之行營勢逼和林
恨博囉之犯闕紅羅應瑞先聲假龍鳳之元黃幟揚威大
戒肅虎貔之氣追奔朔漠早礮聞位於張陳定業南京克
采嘉謨於劉宋詭言靖難易衣披牒之虛詞漫詡平戎瘞
豕摩崖之遠略洪宣歲月依稀文景之朝土木風煙倉猝
徽欽之駕邊關雪擁嚴守堞於辰居天闕星明急撞門於
午夜健遷並進諮賢則煖閣平臺璵璠紛爭讀禮則明堂
饗殿香葉冠之狐媚簿錄冰山番貨舶之鴟張矛鋌水國
經帷竊柄賄金輅以貽慙礦洞搜財稅珠池而增擾正人

一網熒點將之妖言要典三朝翻忤璫之大案綱淪委鬼
頽波挽已已之初原燎橫天餘燼盡甲申之末運重開夫
軒鼎祚永紹乎

義圖凡皆鑑新據舊之思著爲震古鐸今之詠經經緯史
獨斷王鈇仁仁義宜崇宣聖鐸旨歸一范課主德於珍黃
道綜三綱酌宸猷於太紫瑕瑜政蹟陽秋之舊例彌昭蕭
艾品流月旦之前評未允鴻圖否泰關機順逆之交鰲極
升沈縣蕝貞元之會珠衡正景志備乎微顯婉章玉律和
聲教寓乎溫柔敦厚集九成於金石條理鈞天匯萬古之
江河朝宗筆海類排錦譚儼四部之分居典萃琳囊乃五

車之競輳

聖風不啗精言括

欽定之編

智炬重明妙諦蘊

御批之論裴張高鶩會索隱於史裁漢宋紛馳要旁通於
書旨地名事義杜元凱之宗支考異釋文胡三省之流派
遐參渺說包外紀以珍披邇洽咫聞引長編而繩貫氤
寶氣祕文則八會十華醢醢古香達詁則三蒼五雅字矜
來厯陋著述於杜韓什富全經窘傳箋於毛鄭極天維嶽
詎能撮壤乎嵩恆觀水於瀾孰可導涓乎瀛渤臣學慙淺

小才謝探微肆四始而未覩萌芽絜三長而難言寸尺芝
函光賁琳琅垂筆削之中蘭櫝香薰鉛槧繼誦絃之後鑽
研志切欣窺豹於書巖弋釣情殷效塗鴉於墨藪發娜環
之籍玉韻全收檢委婉之文雲章斯印緝詞句下探本事
之根菱織字行間認他端之總紕穿連碎語因知腋可成
裘參互羣言始信輻原共轂列眉義燦

聖謨屏詮解之煩示掌理明彝訓仰會歸之準敬循次第
附盤燭於篇中載企高深罄管蠡於簡末慕賈韋之注帝
範百爾稱榮信游夏之贊聖經一詞俱窒銀光初寫幸削
稿以觀成錦字重刊待然藜而校誤浣餘薇露肅鶴奏於

庚郵翹向松雲稟鴻裁於乙覽從此西崑輯瑞圖書增羣
玉之輝東觀垂型方策軼貞珉之壽左三墳而右五典韻
府鈇規前千古而後萬年詞林章部洪鈞範世黃輿全盛
之昌符泰策延禧紫極長生之寶錄臣無任瞻

天仰

聖踴躍懽忭之至謹拜表恭進以聞

恭進勦平三省邪匪方略表

欽惟我

皇上道正三階網恢六寓珠鈴翼象天聲揚太紫之庭玉
檢開模日景麗中黃之位步亥則埏紘有截靖龕烏澣狼
肱由庚而砥矢無偏熙攘宵翹蠕動辰雲占瑞遐陬方競
梯航候月澄氛羣慝先歸簫勺振著莖於義策鳳紀長歸
披蘭葉於軒圖龍韜斯炳懿翠嫺之膺錄值丹浦之行師
堯袞宵垂

舜干旬舞曦舒龍垤歸邪之宿同輝草毒蛇坵解愠之風
不偃黔區苗靖方翦孽於荆南白社蓮妖潛滋萌於楚北

額堅舌健米五斗以稱師影匿形藏粥一盤而呼鬼熒貼
鄴於龔俗閃病何靈詰識緯於偃巫閉房甯習駟胥橫索
春齋之禁約無方狝母驚傳夜嘯之俯張遂肆駭厲伏雉
乍蹂綠野桑麻聚蟻屯蜂竟擁黑山旗幟九嬰相扇漢巴
沿凶水之波三孽潛苞井絡迤鬼方之域襲壬午兵之敗
兆誌建辰於年月日時踵赤黑丸之奸謀約分號於青黃
藍白敢率亭育逞怒飛飢嘯之狂自絕生成底哀凶鞠頑
之戮拯遺眚於溝壑六月棲戎蠲邪沴以雪霜九天斡化
莅寢門而酌柔武周書承

文考之謨麾高斧而運英謀唐制宣

上皇之命霆轟贊鼓訓狐之魄全禡星指班旗妖鳥之頭
早落捎雲玉駑驅青犢於塵沙灑火金丸奮赤龍於林莽
排空直上爭飛百道梯衝踰壁橫行迅埽千重巖穴伏灌
灣而鹽腦鐵燕驚摧躡長坂以攻心紙鳶飛墮終報寨負
嵎失險鑿破兇門安樂坪山果幕罹災填成苦谷出上津之
三岔追殘徵則游魂踰新野之雙溝轡盡杜曾潰卒捲楚
氛於豫壤甲高能耳之山移蜀檄於秦川馭叱羊腸之坂
勢乘破竹連致渠魁種蔓邪蒿尙繁醜類謂網羅藪澤定
盈封築之鯨鯢奈襟帶川原不盡搔爬之蟻蝨披月章而
望捷焦勞感麟筆之垂奮

天斷以籌戎繼述仰

龍湖之鑒爰頒金策載飭牙璋馳風霆於九霄燭日月於
萬里登壇黃鉞股肱寄將將之權夾陣朱旗犄角布堂堂
之勢令申貔虎守微盧彭濮之疆計蹙狼貙環懇武古通
之帥徵旅則黃頭白羽捲金甲而風趨練材則六郡五家
閃銀刀而電霍捲飛龍以歷塊禁中之李牧先驅運流馬
以輓芻關內之蕭何並出旄頭夜月星辰迴造化之機畫
角長風草木懾王師之氣璇樞高握
睿算無遺玉帳遙開威靈自攝萬全策略宵衣旰食之疇
咨十舍軍郵秋肅春溫之詔令圖傳遁甲目中聚米之形

經演握奇掌上運籌之法趨子儀之堅壁壘石重隍數王
峻之奇兵偃旗易服前禽不誠詎寬失律之誅臥虎無威
必蔽縱奸之罰奔南備北山蛇之首尾斯靈釋實攻虛雲
鳥之陰陽宜辨懋庸佇奏元圭與赤紱同膺戰績詳聞雀
弁與鵷冠並賚察眉知盜錄囚漫致殃魚驗鼻數俘冒級
難容功狗賞懸走卒鼓勇爵以先鳴謀用虜人制貪狠於
反噬鞫誰釀亂弄兵原赤子之僑諭爾脅從作賊匪白頭
之計撫生靈以仁愛稔惡甯容消劫運以祥和嘉兵早戒
天機兆示還憑闕令之權宜露布飛揚特奉綸言而播告
關中父老眞看時雨清塵灞上諸軍如聽春雷啟蟄勢增

百倍峙壁壘以俱新響應八方礪戈鋌而並進沸河動地
連營刁斗之聲絡野籠山列陣風雲之色倒崑崙而壓蟻
穴槐之夢戰猶酣傾溟海以澆瑩腐草之溼生轉幻迷離
妖霧隨卻月以橫斜飄瞥狂氛共撒星而聚散拔豺牙於
迎敵敢助臂螳斷蠱尾於追奔仍回首鼠鏐旗聚合突丈
八之蛇矛銀壁橫排湧三千之犀甲黃塵杳漲接短兵而
金鐵飛鳴白日韜光震巨礮而風煙瀕洞跳身擒馬便羈
敬奉之雕鞍應手仆人爭擲摩訶之銃銳激連珠而飛鏃
箭輒一蠻貊重革以刺鏃稍連十賊奮呼朱鬢瞋目視於
樓煩猝起蒼頭縱拳毆於突厥烽冲虎落兩甄之聲鼓交

墮草掩蟲沙四塞之阡蹊盡滿陟周大野飄殘雨血風毛
暈合重圍撞破銅頭鐵額失魂窮竄始避顏行盡氣狂奔
甯辭蹤躡月明赤壁知烏台之無依星見鄢陵趣雞鳴而
再戰蟻封東潰潛衝函谷之泥虎旅西來忽震昆陽之瓦
探穴巢於鳥鼠俄驚棧渡陳倉落霹靂於魚鳧直訝藤攀
縣谷髑髏臺築泣絳頭毛面之羣山岳軍移窮走戟跳刀
之術矛環絕砦警舞楯以先登石礫高墉毀壞牆而竟入
炬揚雉尾崑岡之石宵燿練捲鷁頭金水之波盡沸鋌亡
無所冒威怯當道之羆轉鬪何能逞技作含沙之蜮張鵬
吻而奪餉葛困一征截驢耳以襲營戎羅三覆混持赤幟

焚旗之兆旋符鑿斷蒼崖畫地之牢奚脫林深箐密識駭
雉之投羅峽靜江寒覺潛鱗之漏網鐵籠把淺舠艍陳京
觀之尸肉翅飛空翬鳳劈巨靈之掌誅逋獨柳窮鬼道於
八通勇賈前茅策神兵於再厲二分逕仄岸容足以刀穿
十丈竿垂絙縋身而墮裹銜枚夜雪不聞鵝鴨之聲結葦
晨漸競踐狐狸之迹沸湯溢谷決晉陽沉竈之波炎瘴漫
山衝垺野洗兵之雨樛枝匿帀歸五技以俱窮灌莽蕭條
兔三窟而何有滅蛇虺之凶族并滌腥涎殄蛩驅之奸類
全消毒祲椎牛呼飲綠林之豪客安存殺馬充糧白挺之
餓徒同盡稻田攢簇翦十畝之蝗蝻茅屋斂斂撲三五之

蚊蚋積尸閃閃辨骨節於防風貫索纍纍數元凶於貳負
燬害金之刀械刺蝟鋒殘收僞職之衣裝沐猴冠在姓名
盡變奚逃對簿之神鬚髮徒茭終就鼓鑪之燎藁街駢戮
誰憐劉關妻兒郤屋招亡早喪白波黨類被恩言以解難
迎門而裴度撫師感赦令以乞降獻級而夷吾舉盜後舞
前歌之衆還鄉結伴之辰籜隕而老木園空莠剗而大禾
田茂茆坪竹峪行旅纔通麻地芝苞人家無恙礮名狼渡
笑鼃尾於沙中山號熊藏想蹲身於檻底欖槍夜掃披三
星寨之晶熒闔闔晴開赴二天門之詖蕩龍鳳堙風沙飛
舞總是前塵馬鹿坪卒伍奔馳都成往蹟木蘭寺裏漫愁

野草閒花石筍河邊徒見高山流水捷頭鵝而書走嶺記
鵝公縛連雞而柵空壩存雞子敵延甯入巖扃瞻鐵鎖之
關虜守何因餘臭慨銅錢之窖當日紅巖染血朱里同殷
於今紫水消燐黃泡共息大神山靜不聞鬼笑靈談古佛
硎深從此除灾度厄殘形剗破溝腦厓賸啄烏鳶吉語聽
來關耳梁猶喧鳥鵲二郎五郎之地數逆豎以連殲中龕
上龕之區剔叢林而俱淨四方臺正一盃泉清雲霧豁而
山明旗鼓寢而寨偃龍池草長引馬道之晨嘶駱寺人過
起鴉城之夕噪團包晝出白堖青觀之鄉戰壘春回紫竹
紅花之路安如磐石卜居磨子巖前疲未津梁攬轡橋兒

溝畔同舟鼓掌話任河鼎沒之時異地關心問葉縣擒囚
之處柳樹灣之接葉勿翦棠陰花石巖之填阮直投齋曰
從巴峽以穿巫峽知髦孺之冀衢向洛陽而下襄陽識閭
閻之按堵麻符鼎吉三省咸甯運叶復來七年大定襄封
送喜達夜奏於甘泉箛律回和迓春聲於寒谷宣饒雷動
樂章競布黃神布闔天謹時令剛乘青帝帷中闔外膚公
則五等高班柳往雪來爪士則三官立進丁租重復新田
之蓺粟無徵甲乘均施太府之頒鏐奚算賚推帖岷尸饗
移孝子之忠恩溢蓋帷廟享著盡臣之烈至仁幬覆觀龍
光而零露濃霑常武昭宣孚鴻貺則

在天篤眷報弓遺於四載受命敷前慶于戢於六師成功
愆後苗鋤髮櫛防遺種以搜林土返水歸遣游兵而籍里
納金城之上策設戍校而置營屯控玉壘於西邊剖庚符
而開幕府勢連臂指統戎緬羊杜之規效復瘡痍簡吏課
龔黃之績制邊防於會哨倣投戈息馬之風省戶役於耕
耰綏賣劍買牛之俗昭茲

睿略刊碑甯紀夫淮平洪我

聖猷帝典宜詳於苗格爰開館局仿軍志之成書載秉

宸裁定戎經之大旨撥麴竣績方臚祕畫於六韜薙草消
萌還繼凱音於三捷絕螟蛉棲於假息伏戎之遺孽斯除懲

鶴列以祛頑屏藩之餘兇胥殄說申邪教鈴機具闢芸編
詩記新兵筆削並垂芝檢勤考文於桐鼓參單日隻日之
章詳著錄於陰符兼內篇外篇之例駿旨括環珠之要庶
成唐代一經鴻模揚金匱之輝真邁周家三策臣等叨依
樞禁忝效編摩誌綸綽於面承彙縹緗而手錄訓辭恭繕
嚴聽午夜銅籤章奏重釐恍接庚郵銀匱承平有自特書
偃伯於靈臺榦次初成竊幸依光於冊府稟權輿於詩史
在重華誌喜之年綜經緯於

廟謨正春勝拈題之日四百卷金鼇獻冊拜揚抒鳧藻之
忱萬億年玉虎徵祥謳誦協鷺鏡之曲臣等無任瞻

天仰

聖踴躍懼忭之至謹拜表恭進以聞

補授通政使司副使謝摺

通政使司副使臣童槐跪奏爲恭謝

天恩事本月二十六日內閣奉

上諭通政使司副使著童槐補授欽此竊臣謬以幹材游
陳臬事經年承乏未週齊魯滔風一旦量移尤惕荆襄重
地觀

天顏於召對甫效葵傾聆

聖訓於祗承難申錫獻迺復仰叨

溫綽擢晉清班俾貳職於銀臺獲依光於

丹陛顧念無毫髮之效何期預喉舌之司臣惟有矢慎封

題勸勤夙夜際

達聰之盛治幸佐納言仰

詢事之殷懷勉思稱職期無忝追隨於九列庶稍酬
高厚於萬分所有微臣感激下忱理合繕摺恭謝

天恩伏祈

皇上聖鑒謹奏

授少詹事謝摺代

臣材謝瓊條質慙瑕玷蚤忝東僚於特達旋膺外吏以叢
愆辜

大造之生成恨同龔隤荷

洪慈之拂拭辱預清華鼇禁修書重習詞臣之舊業螭坳
簪筆更叨講職之新除雖出身在文史之間難藉手效涓
埃之報循涯滋疚落殖方虞迺蒙

渥沛殊施特予晉升詹副憶昔倖魁廷試曾踰坊局以超
遷訖今驟佐儲端仍破階資而越擢在他人之偶得已驚
遭際非常況異數之頻邀竊念生平何幸問途芝苑敢云

就熟路而駕輕車涉學芸編還冀擷春華而垂秋實庶資
晚蓋稍副

恩培